



Filmiliortarneq pillugu Inatsisartut inatsisissaannik Naalakkersuisut saqqummiussinissamik peqquneqarnissaannik Inatsisartut aalajangiiffigisassaattut siunnersuut. Inatsisissatut siunnersuut kingusinnerpaamik UKA2024-mi Inatsisartunut saqqummiunneqassaaq.

(Inatsisartunut Ilaasortaq Peter Olsen, Inuit Ataqtigiit)

(Siullermeerneqarnera)

Qujanaq Inatsisartunut ilaasortamut Peter Olsen-imut siunnersuuteqarneranut.

Upernaanerani 2022 siunnersuuteqarpunga, nassuiaammik sanasoqassasoq, qanoq ililluta maani nunatsinni filmiliortarneq nukittorsarsinnaaneripput. Nuannaarutigaa, siunnersuutiga maani Inatsisartuni amerlanerussuteqartunik taparserneqarmat.

Siunnersuuteqarninnut tunuliaqutaavoq, isumaqarama, filmiliortittartut atugaat ajorpallaartut. Filmiliat pilersinneqartut aammalu taakku filmit iluatsilluarneri nunaqavissut filmiliortittartut sulilluarnerisigut pikkorinnerisigullu pisarput. Tamanna anguneqartarpoq naak filmiliortarnermi pissutsit pitsaanngikkaluartut. Taamaattumik eqqarsaattigisimavara, maani nunatsinni filmiliorneq pitsaanerulissagaluartuq, pitsaasunik atugaqartikkaluarsigit.

Upernaaq 2023 nassuiaat, siunnersuutinnut tunuliaqutaasoq aallartinneqarpoq. Taanna nassuiaat innersuussutinik pitsaasorpasuarnik imaqarpoq, tapersertarialinnik. Innersuutit ilaagaat, filminiliornermut inatsimmik sanasoqartariaqartuq soorlu siunnersuuteqartup uani uparuaraa. Tamanna soorunami Demokraatit tungaanniit taparserparput.

Pikkugerujussuarpakka filmiliat angusallu, nunatsinni filmiliortartut atugassarititaasut pitsaasuunngikkaluartut pilersittagaat. Taamaattumillu aamma qilanaarerujussuarlugu takunissaa, suut filmiliortartuutitta pikkorissut pissutsit pitsaasut atulerunik pilersissinnaasaat. Filmit amerlanerit filmillu pitsaanerit tamatsinnut iluaqutaassapput. Filmiliortarneq ingerlalluartaq nunatsinnik nittarsaataallunilu tuniniaanermik annertusitsiinnarani, aamma uagut tamatta filmertarfinni imaluunniit skærmitsinni allarpasuarni pitsaasunik misigisaqartittassamatigut.

Siunnersuutip akuersissutigineqarnissaa innersuussutigalugu ataatsimiititaliami attuumassutilimmi suliareqqinneqarnissaa innersuussutigaarput.